

BÀ SÓ TÈSÀLÓNÌKÀ **Bà só bà cu wáràgà mì Páwòlò jì** **ndâ mbe kù kili ta ɾè mì** **Bìndi-Mbírì gbí gbata** **Tèsàlónìkà**

¹ Muu ze tí ndâ mbe kù cu wáràgà tí nó a ndâ 'duù ta'ô: ñinó a ye tí Páwòlò, gí je ndâ Silivánò ta Tímàtéyò. Ze kù cu wáràgà tí nó jì yo tí ndâ 'duù mì Mbírì tí Bu ndoo, tí ndâ 'duù mì Mbe tí ndoo Jézù tí Bìndi-Mbírì, mbe kù kili ta ɾè mì Bìndi-Mbírì mí gbí gbata Tèsàlónìkà.

² Ze kù 'deke tí ze jì Mbírì tí Bu ndoo, ze delè kù 'deke tí ze jì Mbe tí ndoo Jézù tí Bìndi-Mbírì, máa, ndú 'ví cù 'dé ngo cù ndú mítí yo, ndú delè 'ví si yo 'ví dù ñikì maa.

Bà waa có ta o bà gí Bìndi-Mbírì wúnò

³ Áá mì ze a nderè tacó bà 'dè ñikì maa jì Mbírì go ñinó náa à tí tacó tí yo 'dáá gí, ndâ ná'vindí ze, tacó yo kpónó kù tee njembí yo mítí Mbírì ta wotí tí ndii ñinó sàà kùro gí. Yo delè kù zè tí yo gbí òkò tí yo ñikì ta banga tí ngé ndii gí.

⁴ Ze kù mba tí ze ta ɾè yo kùro ndâ 'bí mbe kù kili ta ɾè mì Bìndi-Mbírì, tacó à tà kpétí má kù pèè mbí yo ta bà mèèkè'i tí yo, yo kpòò kù tee káa njembí yo mítí Mbírì.

⁵ Gbí có bà tee njembí yo kácáá mítí Mbírì ò éno máa, yo ñò ni gí máa, yí a mbe waa yúco.

Káa mboo tàkò ña i tí nò náa yo kù me nò a bà bàkà yo mì Mbírì tí ndâ bòò-gba mì wó tí Mbírì.

⁶ Mbírì bà waa có ta yúcó, yí bà kèèndè mbugo tí nó náa yo kuu gbí nó á mítí ndâ mbe kù mbu yo nó gí.

⁷ Bìndi yí bà kaa yo tí ndâ 'duù tí nó náa à kpónó kù mèèkè'i tí yo nó mítí tó bàndò tí nó náa yí bà kaa ze mítí nó ta o bà túbà tí Jézù mì wó 'do gbírì ta ndâ basìlì mì wó tí Mbírì, náa yí je wotí jì ndú.

⁸ Jézù ta o tí nó bà da nó gí co gbí ngba wu gí bà kèèndè có ndâ vò i mì ndâ mbe si Mbírì tí có lá, ta ndâ mbe biya bà ùnje gítí Banga-Ngú-Có mì wó tí Jézù tí Mbe tí ndoo, jì ndú.

⁹ Ndâ ña ndâ 'duù tí nó bà mbu jì bà waa có mítí ndú, éno máa, ndú 'ví dù tí ndâ vóló-volo 'duù dúú bà ya tí, gii je bà mò ndú 'do kùro Mbe tí ndoo gí, à delè bà mò ndú 'do gbí ngba wotí mì wó gí.

¹⁰ Yí bà me ndâ i tí nó a i ta o tí nó náa yí bà gí tí, tacó wàa, ndâ 'duù tí nó náa yí kaa ndú mò gí mì wó gí nó 'ví ùlù yí, ta bà te duù mítí wó nò. Yo ta o tí nó delè bà dù kuu gbí òkò tí ndâ mbe kù ùlù Jézù, tacó yo ùnje gítí yúcó tí nó náa ze táánò 'dè jì yo nó gí.

¹¹ Njìnò a nderè bà 'deke tí ze jì Mbírì ta o 'dáá gí ká nò. Ze kù yù nambeè 'do mì wó, máa, yí 'ví si yo 'ví dù tí ndâ 'duù mbe 'vii tí ndâ 'duù ñìnó náa yí tè'é tí ndú gí, yí delè ta wotí mì wó 'ví si yo 'ví bàkà go ndâ tó có tí nó 'dáá gbí njembí yo nò, tacó wàa, yo 'ví cee ta nètè tí nó náa yo kù bàkà yee tí kpónó nó 'do gbí có mì bà tee njembí yo mítí wó.

¹² Gbí ña kpokèjì tí nò, ndâ 'duù bà ùlù rẹ Mbe tí ndoo Jézù 'do gbí có mì yo, ndú delè bà ùlù rẹ yo 'do gbí có mì wó, á 'do gbí nambeè mì Mbírì, delè 'do gbí nambeè mì Mbe tí ndoo Jézù tí Bindi-Mbírì.

2

Vò-'duù-tí-nò

¹ À má gítí Rì bà gì Mbe tí ndoo Jézù tí Bindi-Mbírì, ta có gítí bà kili ndoo toko gbaànjé mí mì ndoo ta ndú ta Rì tí nò,

² kòcò ze jì yo éno máa, yo 'ví co ká ngé kù gu ta gúku 'do gbí có mì 'bí 'duù mbe bàkà tí wó tí mbe 'dè-kòcò ta wotí mì Bèrì-mì-Mbírì, ta ndâ mbe kù fiini có éno máa, Rì tí nò co sàà gí nó lá. Njembí yo delè 'ví mù 'do gbí có mì 'bí 'duù mbe 'dè 'vére jì yo éno máa, a ze ká cu wáràgà jì yì ta ña có tí nò nó lá.

³ Yo si 'bí 'duù 'ví eendi yo gítí bà koro ña ndâ có tí nò lá. Tacó Rì tí nò tí Rì bà gì Mbe tí ndoo nó bà co a i bìndi bà gì 'duù tí nó tí gbolò mbe kù gbì gbí njembí wó gítí vò i ta Mbírì nò. 'Duù tí nó náa muu wó bà 'va tí to nò,

⁴ a mbe kù jòè gbí có ta ndâ bààcì 'dáá gí. Yí delè a mbe si tí wó tí i ndii ndâ i tí nó náa ndâ 'duù kù ci i jì ndú nó 'dáá gí. Yí si tí wó tí gbolò i tí ña ñinó náa ndú kpónó nje bá ta Mbírì ká gbaànjé. Yí delè kpónó kù kò kò jì ndâ 'duù máa, yì lá a Mbírì.

⁵ Bà mbí yo ó-ò? Ye táánò 'dè có gítí bà co Rì bà gì Bìndi-Mbírì nó jì yo ta o tí nó náa ye táánò kuu mì yo kà nó lá?

⁶ Yo delè òò i tí nó mbe kù zèè 'duù tí nó ta yúcó mì wó wálá nó, tii mí to, di tí o bà co Ẹi tí nó náa à ci nó, ni gí.

⁷ Bà jòò gbí có ta Bìndi-Mbíri kponó kuu tí, káa, a i náa à kù bàkà tí a i gbí ọa kpokèjì ònó náa bà 'di gbí kpò ndâ 'duù muu to tí nó gí, yee tí o tí nó náa à má mò i tí nó mbe kù nè kpokèjì 'do tí nó á 'do tí kpokèjì má kózò gí,

⁸ bìndi 'duù tí nò tí mbe kù gbì gbí njembí wó gítí vò i ta Mbíri nò bà gù co gí gbí ngbàà ẹi. Bìndi Mbe tí ndoo Jézù bà gù zi yí, ta bà òlò woò gbí nje wó mítí wó, bà co Jézù ta ngba wó bà zi yí gí.

⁹ Bà gí 'duù tí nò tí mbe kù gbì gbí njembí wó gítí vò i ta Mbíri nò bà dù a i ta wotí mì Vò-'duù-tí-nò. Yí bà gí gí bà bàkà ndâ mbù seṛè ta gbí ndú wálá, ta bà túbà ndâ mbó, ta bà bàkà ndâ kpo-kpò i,

¹⁰ ta bà bàkà ndâ vo-vò tiri tacó bà ee ta ndi ndâ 'duù ònó tí ndâ kánjì ku nò, tacó ndú biya bà dù ta go yúcó, tacó wàa ndâ yì 'ví 'de tí ta 'válá nò gí.

¹¹ Tacó ènò, Mbíri kù tuu vò muu ji ndú, tacó wàa, ndú 'ví ùnje ká gítí 'véṛè.

¹² Mbíri bàkà ènò tacó bà waa có mítí ndâ mbe si bà co tí kpokèjì ònó jáá nó mí to, káa àá gù nìkì tí ndú a bà co tí lókó-loko kpokèjì nò.

Mbíri cu 'bì wó mítí yo tacó bà 'vala yo

¹³ Káa àá mì ze a nderè tacó bà 'dè nìkì maa ji Mbíri tacó tí yo ta o 'dáá gí, ndâ ná'vindí ze, tí ndâ wú-gbí-ṛé Mbe tí ndoo. Tacó Mbíri táánò cu 'bì wó mítí yo 'do tí o bà 'bità bà suu to tí nó

tacó bà 'vala yo ta bà bàkà yo mì Bèrì-mì-Mbířì tí ndâ ngbáràngà 'duù, delè ta ba ùnje mì yo gítí yúcó.

¹⁴ Mbířì tè'é tí yo tacó bà 'vala yo nò a i 'do gbí bà ma Banga-Ngú-Có mì ze jì yo, tacó wàa yo 'ví 'de tí ta bàndò bà dù yo ñìndi yo gbí ngba Mbe tí ndoo Jézù tí Bìndi-Mbířì.

¹⁵ À má éno, yo 'dò kò yo mí to tí kpoò, wàa yo 'ví kpolo tí có tí nó náa ze táánò 'dè jì yo ta nje ze, ze delè gii cu jì yo ta wáràgà nô, ndâ ná'vìndí ze.

¹⁶ Ze kù 'deke tí ze tacó tí yo jì Mbe tí ndoo Jézù tí Bìndi-Mbířì, ze delè kù 'deke tí ze jì Mbířì tí Bu ndoo, tí mbe kù zè ndoo ñìkì maa, náa yí gii je tí ta 'dè njembí jì ndoo dúú kù ya tí , gii toko ta bà kořo tó có gítí 'válá bìndi ku mì ndoo, á 'do gbí nambeè mì wó,

¹⁷ éno máa, ndú 'ví si njembí yo 'ví dù tí yú njembí gbí bà bàkà ña ndâ tó i 'dáá gî, delè gbí bà 'dè yúcó.

3

Yo 'deke tí yo jì Mbířì tacó tí ze

¹ Ndòngbú có mì ze jì yo 'ví éno máa, yo 'deke tí yo jì Mbířì tacó tí ze, ndâ ná'vìndí ze. Yo 'deke tí yo jì Mbířì, tacó wàa, yí 'ví si có mì Mbe tí ndoo 'ví 'vèè gálà-gálà, wàa ndâ 'duù tí nó mbe 'dì nó 'ví te duù mítí , á go ñìno náa yo kpónó kù te ta duù mítí nô.

² Yo delè 'ví 'deke tí yo éno máa, yí tí Mbířì 'ví 'vala ze á 'do 'bì ndâ mbe vò muu tí nó tí ndâ vóló-volo 'duù nó, tacó ndâ mbe tee njembí ndú mítí Mbířì lá nó ògbù ngé.

³ Káa Mbe tí ndoo me mbe 'dè có gî, wàa yí gîl ñònòkò gbí 'bá wó 'do tí po ngo nje wó gî nò lá. Yí bà je wotí ji yo gî, yí delè bà kpolo tí yo 'do tí Vò-'duù-tí-nò gî.

⁴ Káa à má gítí yo, ze bà be tí Mbe tí ndoo gî, máa, yo kpónó kù bàkà ndâ i tí nó náa ze táánò 'dè có gítí ndú ji yo nô, yo delè bà bàkà ndú kpòò kù ya tí gí kùro.

⁵ Ze kù 'deke tí ze ji Mbe tí ndoo éno máa, yí 'ví 'vìsì njembí yo tí njembí ndâ mbe ñò tó bà zè tí mì Mbírì ni , yí delè 'ví si yo 'ví dù tí ndâ 'duù ñinó mbe kù kònò vò i go i mì Bìndi-Mbírì nô.

Kózò tí yo 'ví bàkà nèté

⁶ Ze kù 'dè có ji yo ta rẹ̀ mì Mbe tí ndoo Jézù tí Bìndi-Mbírì, ndâ ná'vindí ze, éno máa, yo dù gí ndiì 'do tí ndâ ná'vindí ndoo ñinó ta go bà bàkà nèté tí ndú wálá, mbe kù 'vala me go ña bà 'vala ndò tí nó náa ze táánò kpili ji yo nó lá nô.

⁷ Tacó yo ta kpéétí yo ñò ni gî, éno máa, nèté mì yo a bà mèlè ndi ze. Káa yo ñò ta ro yo gí máa, ze táánò ta o tí nó náa ze kuu mì yo kà nó me ndâ mbe kê-ro lá.

⁸ Ze táánò me ndâ mbe kù lì 'bì ze gí tà i 'do mì 'bí 'duù sínò lá. Jé lá! Ze táánò kù zò i 'do ká gbí bà ka wu'o mì ze. Ze táánò wu gbí gó ri gítí nèté mì ze lá, ze delè wu gbí bèbìlì lá. Ze bàkà éno tacó wàa, ze 'ví ba gbímbí yo ta bà zò-mítí-yo nò lá.

⁹ Ze táánò kù ziki tí ze ta bà bàkà nèté rẹ̀'bè-rẹ̀'bè ta wu'o nò, me tacó máa yúco mì ze tacó bà 'dè có ji yo éno máa, yo je i ñinó ji ze, yo bàkà éno ji ze, wálá nò, lá. Ze bàkà éno a i tacó bà

tùbà bà bàkà nèté jì yo, tacó wàa yo 'ví bàkà go yí .

¹⁰ Ze táánò 'dè có jì yo si ze kuu mì yo kà nó éno máa, 'duù má biya bà bàkà nèté gî, yí 'ví zò i lá, nò gî.

¹¹ Káa ze kpónó kù 'dì có éno máa, ndâ 'bí 'duù 'do gbí òkò tí yo kà a ndâ vo-vò mbe kpó, ta go bà tee 'bí ndú mí tí nèté tí ndú wálá. À tí ndú káa go bà yuu nje ndú gí gbí có mì ndâ 'bí 'duù ta ẹ̀rè ndú gbí wálá.

¹² Ze kù 'dè có jì ndâ ọ̀nà ndâ 'duù tí nò ta ẹ̀rè mì Mbe tí ndoo Jézù tí Bìndi-Mbíri éno máa, ndú si ọ̀nà nèté tí nò mí to, wàa ndú 'ví bàkà a nèté tacó bà 'de ta i bà ko ta tí ndú.

¹³ Wo yo 'ví co ta bà bàkà i ọ̀nà náa à tí nó lá, ndâ ná'vindí ze.

¹⁴ 'Bí 'duù gbaànjé gbí òkò tí yo má biya bà 'dì có tí nó náa ze cu mí gbí wáràgà tí nó nó gî, yo 'ví kii'ba 'do tí 'duù tí nò. Nèté mì yo 'ví dù ta yí káká'i wálá. Tacó wàa, yí 'ví ọ̀nà tí ni éno máa, kpokèjì tí nó náa yì kù co tí nó a lókó-loko kpokèjì.

¹⁵ Káa yo 'ví mèèkè'i tí wó go bà mèèkè'i tí ku'dì nó lá. Yo kpo-gbì-tà-tù wó, tacó yí a ná'vindí yo, tacó wàa, yí 'ví dele ta ndi wó gítí jáá kpokèjì.

Ndòngbú có

¹⁶ Ze kù 'deke tí ze jì Mbe tí ndoo, tí mbe kù si ndâ 'duù kù dù nìkì maa, éno máa, yí 'ví si yo 'ví dù nìkì maa ta o 'dáá gî, gbí ọ̀nà ndâ kpokèjì 'dáá gî. Mbe tí ndoo 'ví dù ta yo ta o 'dáá gî.

¹⁷ Nìno a ye tí Páwòlò ká kù cu ndâ 'vé tí nó ji yo mí gbí wáràgà tí nó ta 'dóó 'bì ye. Nìno a mbó ndi 'bì ye gbí ndâ wáràgà mì ye 'dáá gí ká nô. Nìno a cè ña bà cu wáràgà mì ye ká nô.

¹⁸ Ye kù yù nambeè 'do mì Mbe tí ndoo Jézù tí Bìndi-Mbíri tacó tí yo 'dáá gí.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa